

四庫全書薈要

• 乾隆御覽本

集部

欽定四庫全書薈要

集部

詞綜卷八

九

詳校官編修臣繆晉



詞綜卷八

翰林院檢討朱彝尊編

宋詞六十首

孔平仲 一首

米芾 一首

滕宗諒 一首

鄭僅 二首

黃裳 一首

張景脩 一首

孫觴 一首

程過 一首

解昉 一首

陳亞 一首



張舜民一首

王雱一首

蔡挺一首

汪輔之一首

蘇庠三首

劉涇一首

潘元質二首

蘇過一首

秦湛一首

許庭一首

葛勝仲二首

李冠一首

張表臣一首

查荃一首

周紫芝十四首

謝逸九首

謝邁 二首

葛郊 二首

趙鼎臣 一首

廖行之 二首

孔平仲

字毅父新淦人第進士官秘書丞集賢校理
謫知衛州徙韶州復責惠州別駕安置召為

戶部金部郎中出提舉永興路
刑獄帥鄜延環慶有清江集

千秋歲

次韵少
游見贈

春風湖外紅杏花初退孤館靜愁腸碎淚餘痕在枕別
久香銷帶新睡起小園戲蝶飛成對惆悵人誰會隨
處聊傾蓋情暫遣心何在錦書消息斷玉漏花陰改遲

日暮仙山杳杳空雲海

米芾

字元章吳人歷官太常博士知無為軍召為書畫學博士擢禮部員外郎出知淮陽軍有

襄陽集

滿庭芳

與周熱仁試賜茶甘露寺

雅燕飛觴清談揮麈使君高會羣賢密雲雙鳳初破縷
金團窻外爐烟自動開餅試二品香泉輕濤起香生玉
塵雪濺紫甌圓嬌鬟宜美盼雙擎翠袖穩步紅蓮坐
中客翻愁酒醒歌闌點上紗籠畫燭花驄弄月影當軒

頻相顧餘歡未盡欲去且留連

滕宗諒

字子京河南人舉進士歷官天章閣待制徙慶州再知虢州復徙岳州終知蘇州

臨江仙

巴陵

湖水連天天連水秋來分外澄清君山自是小蓬瀛氣
蒸雲夢澤波撼岳陽城帝子有靈能鼓瑟淒然依舊
傷情微聞蘭芷動芳馨曲終人不見江上數峯青

鄭 僅

字彥能彭城人第進士累官吏部侍郎知徐州遷顯謨閣直學士通議大夫贈光祿大夫

謚脩敏

調笑 武陵

烟暖武陵晚洞裏春長花爛熳紅英滿地溪流淺漸聽
雲中雞犬劉郎迷路香風遠誤到蓬萊仙館

又 蘇蘇

聲切恨難說千里潮平春浪濶梅風不解相思結忍送
落花飛雪多才一去芳音絕更對珠簾新月

黃裳

字勉仲延平人歷官端明殿學士贈少傅有演山集詞二卷

雨霖鈴

天南游客甚而今却送君南國西風萬里無限吟蟬暗
續離情如織秣馬脂車去即去多少人惜望百里烟慘
雲山送兩城愁作行色飛帆過浙西封域到秋深且
艤荷花澤就船買得鱸鱖新穀破雪堆香粒此興誰同
須記東秦有客相憶願聽了一闌歌聲醉倒拚今日

張景脩

字敏叔常州人元豐末為
饒州浮梁令遷曹郎中

選冠子

詠柳

嫩水接藍遙堤影翠半雨半烟橋畔鳴禽弄舌夢草繁

心偏稱謝家池館紅粉牆頭步搖金縷纖柔舞腰低軟
被和風搭在闌干終日畫簾高捲春易老細葉舒眉
輕花吐絮漸覺綠陰成慢章臺繫馬灞水維舟誰念鳳
城人遠惆悵故國陽關盃酒飄零惹人腸斷恨青青客
舍江頭風笛亂雲空晚

孫儀

字濟師

菩薩蠻

落梅

一聲羌管吹鳴咽玉溪夜半梅翻雪江月正茫茫斷橋

流水香 含章春欲暮
落日千山雨一點著枝酸
吳姬先齒寒

程

過

字觀過

滿江紅

梅

春欲來時長是與江梅有約
還又向竹林疎處一枝開
却對酒漸驚身老大看花應念人離索
但十分沈醉祝東君長如昨
芳草渡孤舟泊山斂黛天垂幙
黯銷魂無奈暮雲殘角便好折來和雪戴
莫教酒醒隨風落待

殷勤留此寄相思誰堪託

謁金門

江上路依約數家烟樹一枕歸心村店暮更亂山深處
夢過江南芳草渡曉色又催人去愁似游絲千萬縷
倩東風約住

解

昉

字方叔

永遇樂

風暖鶯嬌露濃花重天氣和煦院落烟收垂楊舞困無

奈堆金縷誰家巧縱青樓絃管惹起夢雲情緒憶當時
文衾粲枕未嘗暫孤鴛侶芳菲易老故人難聚到此
翻成輕誤閨苑仙遙蠻箋縱寫何計傳深訴青山淥水
古今長在惟有舊歡何處空贏得斜陽暮草淡烟細雨

陳

亞

字亞之揚州人嘗知潤州仕至司
封郎中一云太常少卿有澄源集

吳處厚云雖一時俳諧
之詞寄興亦有深意

生查子

相思意已深白紙書難足字字苦參商故要檳榔讀

分明記得約當歸遠至櫻桃熟何事菊花時猶未回鄉
曲

張舜民

字芸叟別號浮休居士以薦為諫官仕至吏部侍郎有畫墁集

賣花聲

題岳陽樓

木葉下君山空水漫漫十分斟酒斂芳顏不是渭城西
去客休唱陽關醉袖撫危欄天淡雲閒何人此路得
生還回首夕陽紅盡處應是長安

王雱

字元澤安石子舉進士累官天章閣待制兼侍講遷龍圖閣直學士卒贈左諫議大夫

眼兒媚

楊柳絲絲弄輕柔
烟縷織成愁
海棠未雨梨花先雪
一半春休
而今往事難重省
歸夢遶秦樓
相思只在丁香枝上豆蔻梢頭

蔡挺

字子政一作子正
宋城人第進士熙寧中拜樞密副使卒贈工部尚書謚肅敏子政在渭

久鬱鬱不自得寓意詞曲有玉關人老之歎中使至今優伶歌之遂達禁掖有樞密之拜

喜遷鶯

霜天秋曉正紫塞故壘黃雲衰草漢馬嘶風邊鴻叫月

隴上鐵衣寒，早劍歌騎曲。悲壯盡道君恩須，報塞垣樂。
盡橐鍵錦領，山西年少談笑刁斗。靜烽火一把時送。
報一作平安耗。聖主憂邊，威懷遐遠，驕寇尚寬天討。歲華
向晚，愁思誰念玉關人，老太平也。且歡娛，莫惜金樽頻
倒。

汪輔之

字正夫，宣州人。熙寧中登第，為職方郎中。
廣南轉運使，降知虔州卒。有集三十卷。

行香子

晚綠寒紅，芳意匆匆。惜年華、今與誰同。碧雲零落，數字

賓鴻省渚蓮凋宮扇舊怨秋風
流波墜葉佳期何在
想天教離恨無窮試將前事閒倚梧桐有銷魂處明月
夜錦屏空

趙鼎臣

字承之衛城人元祐中進士宣和中以右文
殿脩撰知鄆州召為太府卿卒贈待制有竹

隱時

士集

念奴嬌

送王長卿赴
河間司錄

舊游何處記金湯形勝蓬瀛佳麗綠水芙蓉元帥與賓
僚風流濟濟萬柳亭邊雅歌堂上醉倒春風裏十年一

夢覺來烟水千里 惆悵送子重游南樓依舊否朱欄
誰倚要識當時惟是有明月曾陪珠履量減杯中雪添
頭上甚矣吾衰矣酒徒相問為言憔悴如此

蘇庠

字養直丹陽人紹聖中同徐俯薦于
朝不起自放江湖間有後湖集一卷

菩薩蠻

自宜興還
西岡作

園林寂寂春歸去濛濛柳下飄一作飛香絮野水接雲橫

綠烟啼曉鶯江南鷓鴣夢山色朝來重小艇小灣頭

蘋花蘋葉洲

木蘭花令

江雲疊疊遮鴛浦江水無情流薄暮歸帆初張葦邊風
客夢不禁蓬背雨渚花不解留人住只作深愁無盡
處白沙烟樹有無中雁落滄洲何處所

臨江仙

荷花

獵獵風蒲初暑過瀟然庭戶秋清野航渡口帶烟橫晚
山千萬疊別鶴兩三聲秋水芙蓉聊蕩槳一樽同破
愁城蓼花灘上白鷗明暮雲連極浦急雨暗長汀

劉

涇

字巨濟簡州人舉進士元符末官職方郎中有前後集

清平樂

深沈院宇枕簟清無暑睡起花陰初轉午一霎飛雲過
雨雨餘隱隱殘雷夕陽却照庭槐莫把珠簾垂下妨
他雙燕歸來

潘元質

金華人

倦尋芳

獸鐶半掩鴛甃無塵庭院瀟灑樹色沈沈春盡燕嬌鶯

姹夢草池塘青漸滿海棠軒檻紅相亞聽簫聲記秦樓
夜約彩鸞齊跨漸迤邐更催銀箭何處貪歡猶繫驄
馬旋剪燈花兩點翠眉誰畫香滅羞回空帳裏月高猶
在重簾下恨疎狂待歸來碎揉花打

醜奴兒慢

愁春未醒還是清和天氣對濃綠陰中庭院燕語鶯啼
數點新荷翠鈿輕泛水平池一簾風絮才晴又雨梅子
黃時忍記那回玉人嬌困初試單衣共攜手紅窓描

繡畫扇題詩怎有而今半牀明月兩天涯章臺何處多
應為我蹙損雙眉

蘇過

字叔黨，第三子。初監太原府稅，次知潁昌府。郎城縣皆以法令罷。晚權通判中山府，留家潁昌營，自號斜川居士。時稱為小坡有斜川集。

點絳脣

高柳蟬嘶采菱歌斷，秋風起晚雲如髻。湖上山橫翠，
簾卷西樓過雨涼生袂。天如水，畫欄十二少箇人同倚。

秦湛

字處觀，子官宣教郎。

謁金門

鴛鴦浦春漲一江花雨隔岸數聲初過櫓晚風生碧樹
舟子相呼相語載取暮愁歸去寒食江村芳草路愁
來無著處

許庭

字伯揚
濠梁人

臨江仙

詠柳

不見灞陵原上柳往來過盡蹄輪朝離南楚暮西秦不
成名利贏得鬢毛新莫怪枝條憔悴損一生惟苦征

塵兩三烟樹倚孤村夕陽影裏愁殺宦遊人

葛勝仲

字魯卿丹陽人紹聖四年進士歷官禮部員外郎權國子司業遷太常卿兼諭德除國子

祭酒尋知汝州改湖州紹興元年卒謚文康有丹陽集詞一卷

點絳脣

縣齋愁坐

秋晚寒齋藜牀香篆橫輕霧閒愁幾許夢逐芭蕉雨

雲外哀鴻似替幽人語歸不去亂山無數斜日荒城鼓

鷓鴣天

玉琯還飛換歲灰定山新棹酒船回年時梁燕雙雙在

肯為人愁便不來
衰意緒病情懷
玉山今夜為誰顏
年時梅蕊垂垂破
肯為人愁便不開

李

冠

字世英
山東人

蜨戀花

遙夜亭皋閒信步才過清明漸覺傷春暮
數點雨聲風約住
朦朧淡月雲來去
桃杏依稀香暗度
誰在秋千笑裏輕輕語
一寸相思千萬緒
人間沒箇安排處

王介甫云

張子野雲破月來花弄影不
如冠勝朧淡月雲來去也

張表臣

官承議郎通判常州著珊瑚鉤詩話

驀山溪

游甘露寺

樓橫北固盡日懨懨雨欸乃數聲歌但渺漠江山烟樹
寂寥風物三五過元宵尋柳眼覓花鬚春色知何處
落梅嗚咽吹徹江城暮脉脉數飛鴻杳歸期東風凝竚
長安不見烽起夕陽間魂欲斷酒初醒獨下危梯去

查莖

透碧霄

艤蘭舟十分端是載離愁練波送遠屏山遮斷此去難
留相從爭奈心期久要屢變霜秋歎人生杳似萍浮又
翻成輕別都将深恨付與東流想斜陽影裡寒烟明
處雙槳去悠悠愛渚梅幽香動須采掇情纖柔艷歌粲
發誰傳餘韵來說仙遊念故人留此遐州但春風老後
秋月圓時獨倚江樓

周紫芝

字少隱宣城人舉進士為樞密
編修守興國有竹坡詞三卷

高郵孫競序云竹坡樂章清
麗婉曲非苦心刻意為之

鷓鴣天

一點殘紅欲盡時
乍涼秋氣滿屏幃
梧桐葉上三更雨
葉葉聲聲是別離
調寶瑟
撥金猊
那時同唱鷓鴣詞
如今風雨西樓夜
不聽清歌也淚垂

醉落魄

江天雲薄江頭雪
似楊花落寒燈不管人離索
照得人來真箇睡不著
歸期已負梅花約
又還春動空飄泊
曉寒誰看伊梳掠
雪滿西樓人在闌干角

生查子

金鞍欲別時芳草溪邊渡
不忍上西樓怕看來時路
簾幙卷東風燕子雙雙語
薄倖不歸來冷落春情緒

又

春寒入翠帷月淡雲來去
院落半晴天風撼梨花樹
人醉掩金鋪閒倚秋千柱
滿眼是相思無說相思處

又

青絲結曉鬟臨鏡心情懶
知為曉愁濃畫得雙蛾淺

柳困玉樓空花落紅窓暖相對語春愁只有春閨燕

謁金門

春雨細開盡一番桃李柳暗曲欄花滿地日高人睡起
綠浸小池春水沙暖鴛鴦雙戲薄倖更無書一紙畫
樓愁獨倚

朝中措

雨餘庭院冷蕭蕭簾幙度微颺鳥語喚回殘夢春寒勒
住花梢無聊睡起新愁黯黯歸路迢迢又是夕陽時

候一鑪沈水烟銷

又

黃昏樓閣亂栖鴉
天末淡微霞
風裏一池楊柳月邊滿
樹梨花
陽臺路遠魚沈尺素人在天涯
想得小窓遙
夜哀絃撥斷琵琶

宴桃源

林外野塘烟膩衣
上落梅香細
瘦馬步凌兢人在亂山
叢裡
憔悴憔悴回望小樓千里

品令

九日 上西
庵絕頂

霜蓬零亂笑綠鬢光陰晚紫萸時節小樓長醉一川平
遠休說龍山佳會此情不淺黃花香滿記白苧吳歌
軟如今却向亂山叢裏一枝重看對着西風搔首為誰
腸斷

清平樂

烟鬟斂翠柳下門初閉門外一川風細細沙上暝禽飛
起今宵水畔樓邊風光宛似當年月到舊時明處共

誰同倚闌干

點絳脣

西池桃花
落盡賦此

燕子風高小桃枝上花無數
亂溪深處滿地飛紅雨
喚得春來又送春歸去
渾無緒劉郎前度空記來時路

一剪梅

送楊師
醇赴官

無限江山無限愁
兩岼斜陽人上扁舟
闌干吹浪不多
時酒在離樽情滿滄洲
早是霜華兩鬢秋
目送飛鴻
那更難留問君尺素幾時來
莫道長江不解西流

江城子

夕陽低盡柳如烟
澹平川
斷腸天
今夜十分霜月更娟娟
怎得人如天上月
雖暫缺
有時圓
斷雲飛雨又經年
思淒然
淚涓涓
且做如今要見也
無緣因甚江頭來
去雁飛不到小樓邊

謝

逸

字無逸臨川人第進士有溪堂詞一卷

花心動

風裏楊花輕薄性
銀燭高烧心熱香餌懸鉤魚不輕吞

辜負釣兒虛設桑蠶到老絲長絆鍼刺眼淚流成血思
量起粘枝花朵果兒難結海樣情深忍撇似夢裏相
逢不勝歡悅出水雙蓮摘取一枝可惜並頭分拆猛期
月滿會姮娥誰知是初生新月折翼鳥甚日于飛時節
沈天羽云此詞句句比
方用小雅鶴鳴篇體也

蝶戀花

豆蔻梢頭春色淺新試紗衣拂袖東風軟紅日三竿簾
幙捲畫樓影裏雙飛燕攏鬢步搖青玉碾缺樣花枝

葉葉蜂兒顫獨倚闌干凝望遠一川烟草平如翦

如夢令

花落鶯啼春暮陌上綠楊飛絮金鴨晚香寒人在洞房
深處無語無語葉上數聲秋雨

柳梢青

香肩輕拍樽前忍聽一聲將息昨夜濃歡今朝別酒明
日行客後回來則須來便去也如何去得無限離情
無窮江水無邊山色

燕歸梁

六曲闌干翠幙垂香燼冷金猊日高花外嘒黃鸝春睡
覺酒醒時草青南浦雲橫西塞錦字杳無期東風只
送柳綿飛全不管寄相思

南歌子

雨洗溪光淨風掀柳帶斜畫樓朱戶玉人家簾外一眉
新月浸梨花金鴨香凝袖銅荷燭映紗鳳盤宮錦小
屏遮夜靜寒生春筍理琵琶

江神子

一江秋水碧灣灣繞青山玉連環
簾幙低垂人在畫圖間
閒抱琵琶尋舊曲彈未了意闌珊
飛鴻數點拂雲端倚欄看
楚天寒擬倩東風吹夢到長安
恰似梨花春帶雨愁滿眼淚闌干

青玉案

蘆花飄雪迷洲渚送秋水連天去
一葉小舟橫別浦數聲鴻雁兩行鷗
鷺天淡瀟湘暮
蓬窓醉夢驚簫鼓回

首青樓在何處柳岬風輕吹殘暑菊開青葉葉飛紅樹
江上瀟瀟雨

清平樂

花邊柳際已漸知春意歸信不知何日是舊恨欲拚無
計故人零落西東題詩待倩歸鴻惟有多情芳草年
年處處相逢

謝

邁

字幼槃逸從弟布
衣有竹友詞一卷

醉蓬萊

中秋懷
無逸兄

望晴峰染黛暮靄澄空碧天無漢圓鏡高飛又一年秋
半皓色誰同歸心暗折聽喚雲孤雁問月停杯錦袍何
處一樽無伴好在南鄰詩盟酒社刻燭爭成引觴愁
緩今夕樓中繼阿連清玩飲劇狂歌歌終起舞醉冷光
零亂樂事難窮疎星易曉又成浩歎

蝶戀花

留董之南
過七夕

一水盈盈牛女渡目送經年脈脈無由語後夜鵲橋知
暗度持杯乞與閒情緒君似庾郎愁幾許萬斛愁生

更作征人去留定征鞍君且住人間豈有無愁處

葛

郊

字謙問丹陽人有信齋詞一卷

念奴嬌

和人

馮夷微怒披鮫人水府織成綃縠何處飛來雙白鷺點
破一溪寒玉岸柳烟迷海棠酒困贏得春眠足凭欄搔
首為誰消遣愁目遙想居士牀頭竹渠新雨溜瓮中
春醪不惜千鍾為客壽倒卧南山新綠晚月催歸春風
留住費盡紗籠燭恍疑仙洞夢遊天柱林屋

洞仙歌

壬辰六月十日
納涼

瑤樓十二無限神仙侶
紫綬丹麾彩鸞馭步虛聲杳
靄碧落天高微雲淡
點破瑤階白露暗香來水閣水簾
紗幮一枕風輕自無暑
更上水晶簾斗挂闌干銀河淺
天孫將渡終不如歸去
在茗川看千頃菰蒲亂鳴秋雨

廖行之

字天民衡陽人有
省齋詩餘一卷

青玉案

重九憶
羅舜舉

家山去此無多路
久沒个音書去一別而今佳節度黃

花開未白衣到否籬落荒涼處
崢嶸歲月還秋暮空
腹便便無好句菊意愆期開未許
那堪惹恨年來此日
長是蕭蕭雨

點絳脣

送人歸
新城

音信西來匆匆思作東歸計
別懷縈繫為箇人留滯
樽酒團團莫惜通宵醉
還來未滿期君至只在初三是

詞綜卷八

詞綜卷九

翰林院檢討朱彝尊編

宋詞五十六首

周邦彥

三十
七首

晁端禮

四首

田不伐

二首

曹組

七首

萬俟雅言

五首

徐伸

一首

周邦彥

字美成錢唐人歷官秘書監進徽閣待制提舉大晟府出知順昌府徙處州卒贈宣奉大

夫有清真集二
卷後集一卷

晉陽強煥序云美成詞撫寫物態曲盡其妙

劉潛夫云美成頗偷古句 陳質齋云美

成詞多用唐人詩語槩括入律混然天成長

調尤善鋪叙富艷精工詞人之甲乙也 張

叔夏云美成詞渾厚和雅善于融化詩句

沈伯時云作詞當以清真為主蓋清真最為

知音且下字用

意皆有法度

瑞龍吟

章臺路還是一

一作見

褪粉梅梢試華桃樹惜惜坊陌

一作曲

人家定巢燕子歸來舊處 黯凝竚因記箇人癡小乍

窺門戶侵晨淺約宮黃障風映袖盈盈笑語 前度劉

郎重到訪鄰尋里同時歌舞唯有舊來秋壤聲價如故
吟箋賦筆猶記燕臺句知誰伴名園露飲東城閒步事
與孤鴻去探春盡是傷離緒官柳低金縷歸騎晚纖纖
池塘飛雨斷腸院落一簾風絮

黃叔暘云此詞自章臺路至歸來舊處是第一

段自點凝竚至盈盈笑語是第二段此之謂雙拽頭屬
正平調自前度劉郎以下即犯大石係第三段至歸騎
晚以下四句再歸正平諸本
皆以吟箋賦筆處分段非也

蘭陵王

柳

柳陰直烟裡絲絲弄碧隋堤上曾見幾番拂水飄綿送

行色登臨望故國誰識京華倦客長亭路年去歲來應
折柔條過千尺 閒尋舊踪跡又酒趁哀絃燈照離席
梨花榆火催寒食愁一箭一作剪風快半篙波暖回頭一作
首迢遞便數驛望人在天北 淒惻恨堆積漸別浦縈
迴津堠岑寂斜陽冉冉春無極念月榭攜手露橋聞一作
吹 笛沈思前事似夢裡淚暗滴

鎖窓寒

寒食

暗柳啼鴉單衣竚立小簾朱戶桐花一作陰半畝靜鎖一

庭愁雨灑空階更闌未休故人剪燭西窓語似楚江暝
宿風燈零亂少年羈旅 遲暮嬉遊處正店舍無烟禁
城百五旗亭喚酒付與高陽儔侶想東園桃李自春小
脣秀靨今在否到歸時定有殘英待客攜樽俎

側犯

暮霞霽雨小蓮出水紅妝靚風定看步韞江妃照明鏡
飛螢度暗草秉燭遊花徑人靜携艷質追涼就槐影

金環皓腕雪藕清泉瑩誰省滿身香猶是舊荀令見說

胡姬酒壚寂靜烟鎖漠漠藻池苔井

齊天樂

綠蕪彫盡臺城路殊鄉又逢秋晚暮雨生寒鳴蛩勸織
深閤時聞裁剪雲窓靜掩歎重拂羅裯頓疎花簾尚有
練囊露螢清夜照書卷荆江留滯最久故人相望處
離思何限渭水西風長安亂葉空憶詩情宛轉凭高眺
遠正玉液新蕸蟹螯初薦醉倒山翁但愁斜照斂

蘇幕遮

燎沉香消溽暑鳥雀呼晴侵曉窺簷語葉上初陽乾宿
雨水面清圓一一風荷舉故鄉遙何日去家住吳門
久作長安旅五月漁郎相憶否小楫輕舟夢入芙蓉浦

六醜

薔薇謝
後作

正單衣試酒悵客裡光陰虛擲願春暫留春歸如過翼
一去無迹為問家何在夜來風雨葬楚宮傾國釵鈿墮
處遺香澤亂點桃蹊輕翻柳陌多情更誰追惜但蜂媒
蝶使時叩窓牖東園岑寂漸蒙籠暗碧靜遠珍叢底

金安四庫全書 卷九

成歎息長條故惹行客似牽衣待話別情無極殘英小
強簪巾幘終不似一朵釵頭顫裊向人歌側漂流處莫
趁潮汐恐斷鴻一作紅尚有相思字何由見得

大酺

對宿烟收春禽靜飛雨時鳴高屋牆頭青玉旂洗鉛霜
都盡嫩梢相觸潤逼琴絲寒侵枕障蟲網吹粘簾竹郵
亭無人處聽簷聲不斷困眠初熟奈愁極頻一作頓驚夢

輕難記自憐幽獨行人歸意速最先念流潦妨車轂

怎奈向

一作何

蘭成顚衛玠清羸等閒時易傷心目未

怪平陽客雙淚落笛中哀曲況蕭索青蕪國紅糝鋪地
門外荆桃如菽夜遊共誰秉燭

法曲獻仙音

蟬咽涼柯燕飛塵幙漏閣籤聲時度倦脫綸巾困便湘
竹桐陰半侵朱戶向抱影凝情處時聞打窓雨 耿無
語歎文園近來多病情緒嬾樽酒易成間阻縹緲玉京
人想依然京兆眉嫵翠幙深中對薇容空在紈素待花

前月下見了不教歸去

滿庭芳

夏日溽水
無想山作

風老鶯雛雨肥梅子午陰嘉樹清圓地卑山近衣潤費
爐烟人靜烏鳶自樂小橋外新綠濺濺凭欄久黃蘆苦
竹擬泛九江船年年如社燕飄流瀚海來寄脩椽且
莫思身外長近樽前憔悴江南倦客不堪聽急管繁絃
歌筵畔先安枕簟容我醉時眠

應天長慢

寒食

條風布暖霏霧弄晴池臺徧滿春色正是夜堂無月沈
沈暗寒食梁間燕前社客似笑我閉門愁寂亂花過隔
苑芸香滿地狼籍長記那回時邂逅相逢郊外駐油
壁又見漢宮傳燭飛烟五侯宅青青草迷路陌強載酒
細尋前迹市橋遠柳下人家猶自相識

玉樓春

桃溪不作從容住秋藕絕來無續處當時相候赤欄橋
今日獨尋黃葉路烟中列岫青無數雁背夕陽紅欲

暮人如風後入江雲情似雨餘黏地絮

少年遊

并刀如水吳鹽勝雪纖指破新橙錦幄初溫獸香不斷
相對坐調笙低聲問向誰行宿城上已三更馬滑霜
濃不如休去直是少人行

拜星月慢

夜色催更清塵收露小曲幽坊月暗竹檻燈窓識秋孌
庭院笑相遇似覺瓊枝玉樹暖日明霞光爛水盼蘭情

總平生稀見 畫圖中舊識春風面誰知道自到瑤臺
畔春戀雨潤雲溫苦驚風吹散念荒寒寄宿無人館重
門閉敗壁秋蟲歎怎奈何一作一縷相思隔溪山不斷

尉遲盃

隋堤路漸日晚密靄生深樹陰陰淡月籠沙還宿河橋
深處無情畫舸都不管烟波隔前一作南浦等行人醉擁

重衾載將離恨歸去因思舊客京華長偎傍疎林小
檻歡聚冶葉倡條俱相識仍慣見珠歌翠舞如今向漁

村水驛夜如歲焚香獨自語有何人念我無聊夢魂凝
想鴛侶

西河

金陵懷古

佳麗地南朝盛事誰記山圍故國繞清江髻鬟對起怒
濤寂寞打孤城風檣遠度天際斷崖樹猶倒倚暮愁
艇子曾繫空餘舊迹藹蒼蒼霧沈半壘夜深月過女牆
來傷心東望淮水酒旗戲鼓甚處市想依稀王謝鄰
里燕子不知何世入尋常巷陌人家相對如說興亡斜

陽裏

點絳脣

遼鶴歸來故鄉人

一作人

多少傷心地

一作事

短書不寄魚浪

空千里

憑仗桃根說與相思意愁無際舊時衣袂猶

有東風淚

夷堅志云美成在姑蘇與營妓岳楚雲相戀後從京師過吳則岳已從人久矣因飲于

太守蔡璠子高坐上見其妹因作此詞寄之楚雲讀之感泣者累日

又

征騎初停酒行莫放離歌舉柳汀蓮浦看盡江南路

苦恨斜陽冉冉催人去空回顧淡烟橫素不見揚鞭處

一落索

杜宇催歸聲苦和春催去倚欄一霎酒旗風任撲面桃花雨
目斷隴雲江樹難逢尺素落霞隱隱日平西料想是分攜處

荔枝香近

照水殘紅零亂風掀去盡日惻惻輕寒簾底吹香霧黃昏客枕無聊細響當窓雨看兩兩相依燕新乳樓下

水漸綠通行舟浦暮往朝來心逐片帆輕舉何日迎門
小檻朱籠報鸚鵡共剪西窓蜜炬

又

向夜寒侵酒席露微泣烏幃初會香澤方薰無端暗雨
催人但怪燈偏簾卷回顧始覺驚鴻去遠大都世間
最苦惟聚散到得春殘看即是開離宴細思別後柳眼
花鬢更誰剪此懷何處消遣

霜葉飛

露迷衰草疎星挂涼蟾低下林表素娥青女鬪嬋娟正
倍添淒悄漸颯颯丹楓撼曉橫天雲浪魚鱗小見皓月
相省又透入清輝半晌特地留照迢遞望極關山波
穿千里度日如歲難到鳳樓今夜聽西風奈五更愁抱
想玉匣哀絃閉了無心重理相思調念故人牽離恨屏
掩孤顰淚流多少

傷情怨

枝頭風信漸小看暮鷗飛了又是黃昏閉門收返照

江南人去路杳信未通愁已先到怕見孤燈霜寒催睡
早

秋藥香

乳鴨池塘水暖風緊柳花迎面午妝粉指印窓眼曲裏
長眉翠淺聞知社日停鍼線採新燕寶釵落枕夢魂
遠簾影參差滿院

菩薩蠻

銀河宛轉三千曲浴鳬飛鷺澄波綠何處望歸舟夕陽

江上樓 天憎梅浪發故下封枝雪深院捲簾看應憐
江上寒

南柯子 詠梳

桂魄分餘暈檀槽破紫心曉妝初試鬢雲侵每被蘭膏
香染色深沈 指印纖纖粉釵橫隱隱金有時雲雨鳳
幃深長是枕前不見殢人尋

關河令

秋陰時作漸向暝變一庭淒冷佇聽寒聲雲深無雁影

更深人去寂靜但照壁孤燈相映酒已都醒如何消
夜永

過秦樓

一本作惜
餘春漫

水浴清蟾葉喧涼吹巷陌馬聲初斷閑依露井笑撲流
螢惹破畫羅輕扇人靜夜久凭欄愁不歸眠立殘更箭
歎年華一瞬人今千里夢沈書遠空見說鬢怯瓊梳
容銷金鏡漸懶起時勻染梅風地溽梧雨苔滋一架舞
紅都變誰信無聊為伊才減江淹情傷荀倩但明河影

下還看稀星數點

六么令 重陽

快風收雨亭館清殘燠池光靜橫秋影岼柳如新沐聞
道宜城酒美昨日新醅熟輕鑣相逐銜泥策馬來折東
籬半開菊華堂花艷對列一一驚郎目歌韻巧共泉
聲間雜琮琤玉惆悵周郎已老莫唱當時曲幽歡難卜
明年誰健更把茱萸再三囑

氏州第一

波落寒汀村渡向晚遙看數點帆小亂葉翻鴉驚風破
雁天角孤雲縹緲官柳蕭疎甚尚挂微微殘照景物闌
情川途換目頓來催老漸解狂朋歡意少奈猶被思
牽情遠座上琴心機中錦字覺最縈懷抱也知人懸望
久薔薇謝歸來一笑欲夢高唐未成眠霜空已曉

瑞鶴仙

悄郊原帶郭行路永客去車塵漠漠斜陽映山落斂餘
紅猶戀孤城欄角凌波步弱過短亭何用素約有流鶯

勸我重解繡鞍緩引春酌
不記歸時早暮上馬誰扶
醒眠朱閣驚飈動幙扶殘醉
遠紅藥歎西園已是花深
無地東風何事又惡任流光
過却猶喜洞天自樂

望江南

歌席上無賴是橫波寶髻玲瓏歌玉燕繡巾柔膩掩香
羅人好自宜多
無箇事因甚斂雙蛾淺淡梳妝疑見
畫惺忪言語勝聞歌何況會婆婆

花犯
梅花

粉牆低梅花照眼依然舊風味露痕輕綴疑淨洗鉛華
無限清麗去年勝賞曾孤倚冰盤共宴喜更可惜雪中
高士香篝薰素被今年對花太匆匆相逢似有恨依
依憔悴凝望久青苔上旋看飛墜相將見脫圓薦酒人
正在空江烟浪裏但夢想一枝瀟灑黃昏斜照水
黃叔暘云
此只詠梅花而紆徐反覆道盡
三年間事圓美流轉如彈丸

浪淘沙慢

曉一作畫陰重霜凋岼草霧隱城堞南陌脂車待發東門

帳飲乍闌正拂面垂楊堪攬結掩紅淚玉手親折念漢
浦離鴻去何許經時信音絕情切望中地遠天濶向
露冷風清無人處耿耿寒漏咽嗟萬事難忘唯是輕作
離別翠樽未竭憑斷雲留取西樓殘月羅帶光銷紋
衾疊連環解舊香頓歇怨歌永瓊壺敲盡缺恨春去不
與人期弄夜色空餘滿地梨花雪

夜飛鵲

河橋送人處良夜何其斜月遠墮餘輝銅盤燭淚已流

盡霏霏涼露沾衣相將散離會處探風前津鼓樹杪參
旗花驄會意縱揚鞭亦自行遲迢遞路迴清野人語
漸無聞空帶愁歸何意重經前地遺鈿不見斜徑都迷
兔葵燕麥向斜陽影與人齊但徘徊班草款款酌酒極
望天西

解語花

元宵

風銷焰蠟露浥烘爐花市光相射桂花流瓦纖雲散耿
耿素娥欲下衣裳淡雅看楚女纖腰一把簫鼓喧人影

參差滿路飄香麝 因念帝城放夜望千門如畫嬉笑
遊冶鈿車羅帕相逢處自有暗塵隨馬年光是也惟只
見舊情衰謝清漏移飛蓋歸來從舞休歌罷

垂絲釣

縷金翠羽妝成纔見眉嫵倦倚繡簾看舞風絮愁幾許
寄鳳絲雁柱春將暮 向層城苑路鈿車似水時時花
徑相遇舊遊伴侶還到曾來處門掩風和雨梁間燕語
問那人在否

晁端禮

字次膺熙寧六年進士兩為縣令晚以承事郎為大晟府協律有閑適集一卷

能改齋漫錄政和癸巳大晟樂成蔡元長以次膺薦詔乘驛赴闕次膺至都會禁中嘉蓮生遂屬詞以進名並蒂芙蓉上覽之稱善除大晟府協律郎不克受而卒

水龍吟

倦遊京洛風塵夜來病酒無人問九衢雪少千門月淡
元宵燈近香散梅梢凍消池面一番春信記南樓醉裡
西城宴闕都不管人春困屈指流年未幾早驚人潘
郎雙鬢當時體態而今情緒多應瘦損馬上牆頭縱教

瞥見也難相認恁闌干但有盈盈淚眼把羅巾搵

又杏花

小桃零落春將半雙燕却來池館名園相倚初開繁杏
一枝遙見竹外斜穿柳間深映粉愁春怨任紅歌宋玉
牆頭十里曾牽惹人腸斷常記山城斜路噴清香日
遲風暖春陰挫後馬前惆悵滿枝妝淺深院簾垂雨愁
人處碎紅千片料明年更發多應更好約鄰翁看

宴桃源

又是青春將暮望極桃溪歸路洞戶悄無人空鎖一庭
紅雨凝竚凝竚人面不知何處

滿庭芳

綠遶羣峰紅搖千柄夜來暑雨初收共君乘興輕舫信
悠悠且盡一樽別酒荷香裡滿酌輕謳明朝去征帆夜
落何處好汀洲風流吾小阮朝辭東觀夕向南州況
聖時爭教賈傅淹留若過潯陽亭上琵琶淚莫灑清秋
堤邊柳從今愛惜留待繫歸舟

由不伐

南柯子

夢怕愁時斷，春從醉裏回。
淒涼懷抱向誰開。
些子清明時候，被鶯催。
柳外都成絮，欄邊半是苔。
多情簾燕獨徘徊。
依舊滿身花雨，又歸來。

又

團玉梅梢重，香羅菱扇低。
簾風不動蜨交飛。
一樣綠陰庭院，鎖斜暉。
對月懷歌扇，因風念舞衣。
何須惆悵惜

芳菲拚却一年憔悴待春歸

曹

組

字元寵潁昌人宣和三年進士有旨換武階兼閤職仍給事殿中揮麈錄云官止副使有

箕穎集

青玉案

碧山錦樹明秋霽路轉陡疑無地忽有人家臨曲水竹
籬茅舍酒旗沙岸一簇漁樵市淒涼只恐鄉心起鳳
樓遠回頭謾凝睇何處今宵孤館裏一聲征雁半窓斜
月總是離人淚

驀山溪

梅

卷九

護霜雲際遠日明芳樹竹外一枝斜想佳人天寒日暮
黃昏小院無處著清香風細細雪垂垂何況江頭路
月邊疎影夢到消魂處結子欲黃時又須作廉纖細雨
孤芳一世供斷有情愁消瘦東陽也試問花知否

又

草薰風暖樓閣籠輕霧牆短出花梢映誰家綠楊朱戶
尋芳拾翠綺陌自青春江南遠踏青時誰念方羈旅

昔游如夢空憶橫塘路羅袖舞臺風想桃花依然舊樹
一懷離恨滿眼欲歸心山連水水連雲悵望人何處

點絳脣

雲透斜陽半樓紅影明窓戶暮山無數歸雁愁邊去

十里平蕪花遠重重樹空凝竚故人何處可惜春將暮

好事近

梅

茅舍竹籬邊雀噪晚枝時節一陣暗香飄處已不勝愁
絕江南得地故先開不待有飛雪腸斷幾回山路恨

無人攀折

憶少年

年時酒伴年時去處年時春色清明又近也却天涯為客
念過眼光陰難再得想前歡盡成陳迹登臨恨無
語把闌干暗拍

望月婆羅門引

漲雲暮卷漏聲不到小簾櫳銀河淡掃澄空皓月當軒
高挂秋入廣寒宮正金波不動桂影朦朧佳人未逢

歎此夕與誰同望遠傷懷對影霜滿秋紅南樓何處想
人在長笛一聲中凝淚眼立盡西風

万俟雅言

自號詞隱崇寧中充大成府製撰有大聲集五卷

黃叔賜云雅言精于音律自號詞隱發妙旨于律呂之中運巧思于斧鑿之外平而工和而雅比諸刻琢句意而求精麗者遠矣

春草碧

草

又隨芳渚坐

一作生

看翠連霽空愁遍征路東風裏誰望

斷西塞恨迷南浦天涯地角意不盡消沈萬古曾是送

別長亭下細綠暗烟雨何處亂紅鋪繡茵有醉眠蕩
子拾翠遊女王孫遠柳外共殘照斷雲無語池塘夢生
謝公後還能繼否獨上畫樓春山暝雁飛去

三臺

清明
應制

見梨花初帶夜月海棠半含朝雨內苑春不禁過青門
御溝漲潛通南浦東風靜細柳垂金縷望鳳闕非煙非
霧好時代朝野多歡徧九陌太平簫鼓乍鶯兒百轉斷
續燕子飛來飛去近淥水臺榭映秋千鬪草聚雙雙游

女
錫香更酒冷踏青路會暗識天桃朱戶向晚驟寶
馬雕鞍醉襟惹亂花飛絮正輕寒輕暖漏永半陰半晴
雲暮禁火天已是試新妝歲華到三分佳處清明看漢
宮傳蠟炬散翠烟飛入槐府斂兵衛閭闔門開住傳宣
又還休務

卓牌兒

春晚

東風綠楊天如畫出清明院宇玉艷淡泊梨花帶月胭
脂零落海棠經雨單衣怯黃昏人正在珠簾笑語相並

戲蹴秋千共攜手同倚闌干暗香時度
翠窓繡戶路
繚繞潛通幽處斷魂凝竚嗟不似飛絮閒閒愁難消
遣此日年年意緒無據奈酒醒春去

憶秦娥

天如洗金波冷浸冰壺裏冰壺裏一年得似此宵能幾
等閒莫把闌干倚馬蹄去便三千里三千里幾重雲
岫幾重烟水

昭君怨

春到南樓雪盡驚動燈期花信小雨一番寒倚闌干
莫把闌干頻倚一望幾重烟水何處是京華暮雲遮

徐伸

字幹臣三衢人政和初以知音律為太常典樂出知常州有青山樂府一卷

二郎神


悶來彈鵲又攪碎一簾花影謾試著春衫還思纖手熏
徹金猊燼冷動是愁端如何向但怪得新來多病嗟舊
日沈腰而今潘鬢一作不堪臨鏡重省別時淚漬羅
襟猶凝料為我厭厭日高慵起長托春醒未醒雁足一作

翼不來馬蹄難去門掩一庭芳景空佇立盡日闌干倚

遍畫長人靜

黃叔暘云青山詞多雜調
惟二郎神一曲天下稱之

詞綜卷九



總校官庶吉士臣張能照
校對官中書臣潘庭筠
謄錄監生臣姚元娘

欽定四庫全書薈要

集部

詞綜卷十一



詳校官編修臣繆晉

詞綜卷十

翰林院檢討朱彝尊編

宋詞六十一首

陳克 六首

李祁 三首

呂渭老 十七首

趙企 一首

李持正 一首

王采 二首

韓駒 一首

徐積 一首

何籀 一首

蔣子雲 一首



宋齊愈一首

李甲四首

夏倪一首

沈會宗四首

廖世美二首

林少瞻一首

何大圭一首

沈公述一首

魯逸仲一首

何桌一首

陳瓘一首

王安中四首

楊适一首

方喬一首

李玉一首

波子山一首

謝克家 一首

陳

克

字子高臨海人僑寓金陵元豐間以呂安老薦入幕府得官有赤城詞一卷

陳質齋云子高詞格頗

高麗晏周之流亞也

菩薩蠻

赤欄橋盡香街直
籠街細柳嬌無力
金碧上晴空
花晴
簾影紅
黃衫飛白馬
日日青樓下
醉眼不逢人
午香
吹暗塵

又

綠蕪牆遶青苔院中庭日淡芭蕉卷
蝴蝶上階飛風簾自在垂
玉鈎雙語燕寶甃楊花轉幾處
簫錢聲綠窓春夢輕

謁金門

愁脉脉目斷江南江北烟樹重重芳信隔
小樓山幾尺細草孤雲斜日一晌弄晴
天色簾外落花飛不得東風無氣力

又

花滿院飛去飛來雙燕紅雨入簾寒不卷曉屏山六扇
翠袖玉笙悽斷脈脈兩蛾愁淺消息不知郎近遠一

春長夢見

耆舊續聞云和凝詞拂水雙飛東去燕曲檻小屏山六扇

又

柳絲碧柳下人家寒食鶯語匆匆花寂寂玉階春蘚濕
閒凭薰籠無力心事有誰知得檀炷繞窓燈背壁畫
簷殘雨滴

臨江仙

四海十年兵不解，烽烟直到江城。歲華消盡客心驚。
疎髯渾似雪，衰涕欲生冰。送老蘼鹽何處是，我緣應在
吳興。故人相望若為情。別愁深夜雨，孤影小窗燈。

李

祁

字蕭遠，官至尚書郎，宣和間，責監漢陽酒稅。

點絳脣

樓下清歌水，流歌斷春風。暮夢雲烟樹，依約江南路。
碧水黃沙夢，到尋梅處。花無數。問花無語，明月隨人去。

朝中措

郎官湖上探春迴
初見照江梅
過盡竹溪流水
無人知道
花開佳人何處
江南夢遠
殊未歸來
喚取小叢教
看隔江烟雨樓臺

風蝶令

嫋嫋秋風起
蕭蕭敗葉聲
岳陽樓上聽哀箏
樓下淒涼
江月為誰明
霧雨沈雲夢
烟波渺洞庭
可憐無處問
湘靈只有無情
江水遶孤城

呂渭老

一作濱老字聖求秀州人
宣和末朝士有詞一卷

趙師秀云聖求詞婉媚
深窈視美成者卿伯仲

薄倖

青樓春晚晝寂寂梳勻又懶乍聽得鴉啼鶯弄惹起新
愁無限記年時偷擲春心花間隔霧遙相見便角枕題
詩寶釵貫酒共醉青苔深院 怎忘得迴廊下攜手處
花明月滿如今但暮雨蜂愁蜨恨小窓閒對芭蕉展却
誰拘管儘無言閒品秦箏淚滿參差雁腰肢漸小心與
楊花共遠

選冠子

雨濕花房風斜燕子池閣畫長春晚檀盤戰象寶局鋪
碁籌畫未分還嬾誰念少年齒怯梅酸病疎霞盞正青
錢遮路綠絲明水倦尋歌扇空記得小閣題名紅箋
青製燈火夜深裁剪明眸似水妙語如絃不覺曉霜雞
喚聞道近來箏譜慵看金鋪長掩瘦一枝梅影回首江
南路遠

念奴嬌

贈希文
寵姬

暮雲收盡霽霞明
高擁一輪寒玉簾影橫斜
房戶靜小立啼紅
簌簌素鯉頻傳
蕉心微展雙葉明
紅燭開門疑是故人
敲撼窻竹長記那
裡西樓小寒窻靜
盡掩風箏鳴屋淚
眼燈光情未盡儘
覺語長更促短短
霞杯溫溫羅帕妙
語書裙幅五湖何
日小舟同泛春綠

情久長

冰梁跨水沈沈霽色遮千里
怎向我小舟孤棹天外飄
墜夜寒侵短髮睡不穩
窻外寒風漸起歲華暮
蟾光射

雪碧瓦飄霜塵不動寒無際
雞咽荒郊夢也無歸計
擁綉枕斷魂殘魄清吟無味想伊睡起又念遠樓閣橫
枝對倚待歸去西窓剪燭小閣凝香深翠幙饒春睡

滿路花

同柳仲脩
在趙屯

西風晴日短小雨菊花寒
斷雲低古木暗江天星城尺
五佳約悞當年小語憑肩處
猶記西園畫橋斜月闌干
鳥啼花落春信遣誰傳
尚容清夜夢小留連青樓何
處寶鏡注蟬娟應念紅箋事
微暈春山背牕愁枕孤眠

浣溪沙

烟柳濛濛鵲做巢
青青弱草帶斜橋
鶯聲多在杏花梢
逐伴不知春路遠
見人時著小詞招
阿誰有分伴吹簫

南歌子

策杖穿花圃
登臨嘯晚風
無窮秋色蔽晴空
遙見夕陽江上捲飛蓬
雁過菰蒲遠
山遙夢寐通
一林楓葉墮
愁紅歸去暮烟深
處聽疎鐘

祝英臺近

寶蟾明朱閣靜新燕近簾語還記元宵燈火小橋路逢
迎春筍柔微凌波纖穩悄不顧斗斜三鼓甚無據誰
信一霎春愁鶯聲留不住柳色苔痕風雨暗花圓細看
羅帶銀鈎綃巾香淚莫不枉那時分付

江城子

曉參垂戶宿醒醒坐南亭對疎星點點螢光偏向竹梢
明望斷長空何處是雲葉亂彩霞橫西樓依舊抱重

城小銀屏此時情鴉陣翻翻叢枯柳兩三聲歌枕欲尋初
夜夢雞唱遠曉蟾傾

小重山

七夕
病中

半夜燈殘鼠上檠小窓風動竹月微明夢魂偏寄水西
亭琅玕碧花影弄蜻蜓千里暮雲平南樓催上燭晚
來晴酒闌人散斗西傾天如水團扇撲流螢

減字木蘭花

雨簾高捲芳樹陰陰連別館涼氣侵樓蕉葉荷枝各自

秋前溪夜舞化作驚鴻
留不住愁損腰肢一桁香消
舊舞衣

江城子慢

新枝媚斜日花徑霽晚碧泛紅滴近寒食蜂蜨亂點檢
一城春色倦游客門外昏鴉啼夢破春心似遊絲飛遠
碧燕子又語斜簷行雲自沒消息當時烏絲夜語約
桃花時候同醉瑤瑟甚端的看看是榆角楊花飛擲怎
忘得斜倚紅樓回淚眼天如水沈沈連翠壁想伊不整

啼妝影簾側

百宜嬌

隙月垂窺亂葦催織秋晚嫩涼房戶燕拂簾旌鼠窺窓
網寂寂飛螢來去金鋪鎮掩謾記得花時南浦約重陽
萸糝菊英小樓送夜歌舞銀燭暗佳期細數簾幙漸
西風半窓秋雨葉底翻紅水面皺碧燈火裁縫砧杵登
堂望極正霧鎖官槐歸路定須相將寶馬鈿車訪吹簫
侶

夢玉人引

上危梯望畫閣迴綉簾垂曲水飄香小園鶯喚春歸舞
袖弓彎正滿城烟草淒迷結伴踏青趁蝴蝶雙飛賞
心歡計從別後無意到西池自檢羅囊要尋紅葉留詩
懶約無憑據鶯花都不知怕人問強開懷細酌荼蘼

傾盃令

隔座藏鈎分曹射覆燭燄漸催三鼓箏按教坊新譜樓
外月生春浦徘徊爭忍忙歸去怕明朝無情風雨珍

花美酒團坐且作樽前笑侶

一落索

蟬帶殘聲移別樹晚涼房戶秋風有意染黃花下幾點
淒涼雨 渺渺雙鴻飛去亂雲深處一山紅葉為誰愁
供不盡相思句

西江月慢

春風淡淡清晝永落英千尺桃杏散平郊晴蜂來往妙
香飄擲傍畫橋煮酒青帘綠楊風外數聲長笛記去年

紫陌朱門花下舊相識
向寶帕裁書憑燕翼望翠閣
烟林似織聞道春衣猶未整過禁烟寒食但記取角枕
題情東窓休悞這些端的更莫待青子綠陰春事寂

趙

企

字循道大觀
中宰績溪

感皇恩

騎馬踏紅塵長安重到人面依然似花好舊歡纔展又
被新愁分了未成雲雨夢巫山曉千里斷腸關山古
道回首高城似天杳滿懷離恨付與落花啼鳥故人何

處也青春老

李持正

字季秉政和五年進士歷知德慶南劍潮陽三郡終朝請大夫

明月逐人來上元

星河明澹春來深淺紅蓮正滿城開遍禁街行樂暗塵

香拂面皓月隨人近遠天半鰲山光動鳳樓西觀東

風靜珠簾不捲玉輦待歸雲外聞絃管認得宮花影轉

蘇子瞻云好箇皓月隨人近遠

王采

字輔道一云字道輔韶子宣和中官侍郎

玉樓春

秋閨思入江南遠，簾幙低垂閒不捲。
玉珂聲斷曉屏空，好夢驚回還起嬾。
風輕只覺香烟短，陰重不知天色晚。
隔窓人語退朝歸，旋整宿妝勻睡眼。

蝶戀花

梨花

縷雪成花檀作藥，愛伴秋千搖曳東風裏。
翠袖年年寒食淚，為伊牽惹愁無際。
幽艷偏宜春雨細，紅粉闌干有箇人相似。
鈿合金釵誰與寄，丹青傳得淒涼意。

韓

駒

字子蒼仙井監人政和初進士歷遷中書舍人兼權直學士院贈中奉大夫有陵陽集

昭君怨雪

昨日樵村漁浦今日瓊川銀渚山色捲簾看老峰巒

錦帳美人貧睡不覺天孫剪水驚問是楊花是蘆花

徐

積

字仲車楚州山陽人中進士第除揚州司戶參軍楚州教授改和州防禦推官徽宗初立

改宣德郎卒贈謚

節孝處士有集

漁父樂

水曲山隈四五家夕陽烟火隔蘆花漁唱歌醉眠斜綸

竿簾笠是生涯

何

籀

字子初
信安人

宴清都

細草沿階軟
遲日薄
惠風輕
靄微暖
春工靳惜
桃英尚
小柳芽
猶短
羅幃繡幙
高捲
早已是
歌慵笑懶
凭畫樓
那更天
遠山遠
水遠
人遠
堪怨
傳粉疎
狂竊香
俊雅
無計
拘管
青絲絆
馬紅巾
寄羽甚
處迷
戀無言
淚珠零
亂翠袖
儘重重
漬遍
故要得
別後
思量
歸時
覩見

蔣子雲

字元龍

好事近

葉暗乳鴉啼風定亂紅猶落蝴蝶不隨春去入薰風池
閣休歌金縷勸金卮酒病煞如昨簾捲日長人靜任
楊花飄泊

朱齊愈

字退翁宣和間為太學官按
吳曾能改齊漫錄稱誅議

眼兒嬌

梅詞
應制

霏霏疎影

一作雨

轉征鴻人語暗香中小橋斜度曲屏深

院水月濛濛 人間不是藏春處

一作所

玉笛曉霜空江

南處處黃垂密雨綠漲薰風

李

甲

字景元
華亭人

帝臺春

芳草碧色萋萋遍南陌暖絮亂紅也知人春愁無力憶
得盈盈拾翠侶共攜賞鳳城寒食到今來海角逢春天
涯倦客 愁旋釋還似織淚暗拭又偷滴漫倚遍危欄
儘黃昏也只是暮雲凝碧拚則而今已拚了忘則怎生

便忘得又還問鱗鴻試重尋消息

望雲涯引

秋容江上岼花老蘋洲白露溼蒹葭浦嶼漸增寒色閒
漁唱晚驚雁驚飛處映遠磧數點輕帆送天際歸客
鳳臺人散漫回首沈消息素鯉無憑樓上暮雲凝碧時
向西風下認遠笛宋玉悲懷未信金樽消得

八寶妝

門掩黃昏畫堂人寂暮雨乍收殘暑簾卷疎星庭戶悄

隱隱嚴城鐘鼓空
街烟暝半開斜月朦朧
銀河澄淡風淒楚
還是鳳樓人遠桃源無路
惆悵夜久星繁碧雲
望斷玉簫聲在何處
念誰伴茜裙翠袖共攜手
瑤臺歸去對脩竹森森
院宇曲屏香暖凝沈
炷問對酒當歌情懷
記得劉郎否

過秦樓

賣酒壚邊尋芳原上
亂花飛絮悠悠已蜨稀
鶯散便擬把長繩繫日
無由謾道草忘憂也
徒將酒解閒愁正江

南春盡行人千里蘋滿汀洲
有翠紅徑裏盈盈侶簇
芳茵襖飲時笑時謳當暖風遲景任相將永日爛熳狂
遊誰信盛狂中有離情忽到心頭向尊前擬問雙燕來
時曾過秦樓

夏

倪

字均父新州人自府
曹左官祁陽監酒

減字木蘭花

宣和庠子
登涪臺作

江涵曉日蕩漾波光搖槳入笑指涪溪漫叟雄文鎖翠
微休嗟不偶歸到中州何處有獨立風烟湘水涪臺

總接天

沈會宗

字文伯

小重山

花過園林清蔭濃琅玕新脫笋綠成叢語

一作雨

聲只在

小樓

一作池

東閒欹枕敵

一作直

面菱荷風

長

一作斜

日蔽

簾櫳輕塵飛不到畫堂空一樽今夜與誰同人如玉相
對月明中

菩薩蠻

落花迤邐層陰少青梅競弄枝頭小江色雨和烟行人
江那邊好花都過了滿地空芳草落日醉醒間一春
無此寒

驀山溪

想伊不住船在藍橋路別語未甘聽更忍問而今是去
門前楊柳幾日轉西風將行色欲留心忽忽城頭鼓
一番幽會只覺添愁緒邂逅却相逢又還有此時歡否
臨歧把酒莫惜十分斟尊前月月中人明夜知何處

清商怨

城上鴉啼斗轉漸玉壺冰滿月淡寒梅清香來小院
誰遣鸞箋寫怨翻錦字疊疊和愁卷夢破胡笳江南烟
樹遠

廖世美

好事近

落日水鎔金天淡暮烟凝碧樓上誰家紅袖倚闌干無
力鴛鴦相對浴紅衣短棹弄長笛驚起一雙飛去聽

波聲拍拍

燭影搖紅

安陸浮雲樓

靄靄春空畫樓森聳凌雲渚紫薇登覽最闌情絕妙誇
能賦惆悵相思遲暮記當日朱欄共語塞鴻難問岼柳
何窮別愁紛絮催促年光舊來流水知何處斷腸何
必更殘陽極目傷平楚晚霽波聲帶雨悄無人舟橫野
渡數峯江上芳草天涯參差烟樹

林少瞻

眼兒媚 曉行

霽霞散曉月猶明疎木挂殘星山逕人稀翠蘿深處啼
鳥兩三聲霜華重逼雲裘冷心共馬蹄輕十里青山
一溪流水都做許多情

何大圭

字楮之廣德
軍人進士

小重山

綠樹鶯啼春正濃釵頭青杏小綠成叢玉船風動酒鱗
紅歌聲咽相見幾時重車馬去匆匆路隨芳草遠恨

無窮相思只在夢魂中今宵月偏照小樓東

臨卽高恥
庵云玉船

句如雲錦月鉤
奪造化之巧

沈公述

念奴嬌

杏花過雨漸殘紅零落胭脂顏色流水飄香人漸遠難
託春心脈脈恨別王孫牆陰目斷手把青梅摘金鞍何
處綠楊依舊南陌消散雲雨須臾多情因甚有輕離
輕拆燕子千般爭解說些子伊家消息厚約深盟除非

重見見了方端的而今無奈寸腸千恨堆積

魯逸仲

南浦

風悲畫角聽單于三弄落譙門投宿駸駸征騎飛雪滿
孤村酒市漸闌燈火正敲窓亂葉舞紛紛送數聲鶯雁
乍離烟水嘹唳度寒雲好在半朧淡月到如今無處
不銷魂故國梅花歸夢愁損綠羅裙為問暗香閑艷也
相思萬點付啼痕算翠屏應是兩眉餘恨倚黃昏

何

桌

字子鎮一云字文鎮仙井人政和丙申進士
第一歷官尚書右僕射兼中書侍郎死靖康

之難贈觀文
殿大學士

虞美人

贈妓
惠柔

分香帕子揉藍膩欲去殷勤惠重来約在牡丹時只恐
花枝相妒故開遲別來省盡閒桃李日日闌干倚催
花無計問東風夢作一雙蝴蝶遶芳叢

陳

瓘

字瑩中延平人中甲科建中靖國初為右司
諫嘗移書責曾布及言蔡京蔡卞之姦章疏

十上除名編隸合浦以死靖康中贈諫議
夫紹興中追贈諡忠肅有了齋集詞一卷

滿庭芳

淮葉繽紛江烟濃淡別尊同倒寒暉未逢春信霜露惹
征衣往事元無是處何須待回一作白首知非春鶉語從

來勸我長道不如歸家山何處近江樓簾棟夕捲朝

飛問西江荀蕨何似鱸肥且署一作置華胥舊夢忘言處

千古同時君知我平生心事相契古來希

王安中

字履道曲陽人進士及第宣和中累官翰林學士承旨尚書左丞金人來歸燕投慶遠軍

節度使河北河南燕山府路宣撫使加少師郭藥師將叛求罷召還靖康初安置象州紹

興初復左中大夫
有初寮集詞一卷

玉樓春

秋鴻只向秦箏住
終寄青樓書不去
手因春夢有攜時
眼到花開無著處
沉金小字回文句
翠袖紅裙今在否
欲尋巫峽舊時雲
問取高唐臺畔路

一落索

塞柳未傳春信
霜花侵鬢
送君西去
指秦關看日近
長安近
玉帳同時英俊
合離無定路
逢新雁北飛來寄

一字燕山問

清平樂

和晁
倅

花時微雨未減春分數
占取簾疎花密處
把酒聽歌金縷
斜風輕度濃香閒情正
與春長向晚紅燈入坐
嘗新青杏隨觴

洞仙歌

深庭夜寂但涼蟾如畫
鵲起高槐露華透
聽曲樓玉管吹徹伊州金釧
響軋軋朱扉暗叩
迎人巧笑道好箇

今宵怎不相尋暫攜手見淡淨晚妝殘對月偏宜多情
更越饒纖瘦早促分飛霎時休便恰似陽臺夢雲歸後

楊

适

字時可棣州人舉進士
為尚書比部員外郎

南柯子

送淮漕
向伯恭

怨草迷南浦愁花傍短亭有情歌酒莫催行看取無情
花草也關情舊日臨歧曲而今忍淚聽淮山何在暮
雲平待倩春風吹夢過江城

方

喬

樂至
人

生查子

贈紫竹

晨鶯不住啼，故喚愁人起。
無力曉妝慵，閒弄荷錢水。
欲呼女伴來，鬪草花陰裏。
嬌極不成狂，更向屏山倚。

李玉

賀新郎

篆縷消金鼎，醉沈沈、庭陰轉午。
畫堂人靜，芳草王孫知何處。
惟有楊花糝徑，漸玉枕、騰騰春醒。
簾外殘紅春已透，鎮無聊、帶酒厭厭病。
雲鬢亂，未忺整。江南舊事休

重省遍天涯尋消問息斷鴻難倩月滿西樓憑欄久依
舊歸期未定又只恐餅沈金井嘶騎不來銀燭暗枉教
人立盡梧桐影誰伴我對鸞鏡

黃叔暘云李君詞雖不多見然風流蘊藉盡此

篇矣

波子山

宿州獄掾

剔銀燈

途次南京憶營妓張溫卿

一夜隋河風勁霜混水天如鏡古柳隄長寒烟不起波
上月無流影那堪懶聽疎星外離鴻相應須信情多

是病酒到愁腸還醒數疊羅衾餘香未減甚時枕鴛重
並教伊須更將蘭約見時先定

謝克家

字任伯
官叅政

憶君王

徽宗北
行作此

依依宮柳拂宮牆樓殿無人春晝長燕子歸來依舊忙
憶君王月照黃昏人斷腸

避兵夜話云淵聖入敵營不
遑謝元及作此詞鼠璞云語

意悲涼讀之使人墮
淚真憂君憂國之語

詞綜卷十

詞綜卷十一

翰林院檢討朱彝尊編

宋詞六十四首

向子諲

九首

蔡伸

十二首

王庭珪

三首

葉夢得

三首

王之道

一首

向鎬

三首

沈瀛

一首

李邴

三首

劉弇

二首

汪藻

二首

曾紆一首

徐俯一首

趙師俠一首

陳與義二首

劉一止六首

趙長卿九首

王灼二首

張綱一首

王十朋一首

陳濟翁一首

向子諲

字伯恭臨江人敏中玄孫以欽聖憲肅皇后從姪恩補假承奉郎建炎初遷直龍圖閣江

淮發運副使為黃潛善所斥尋起知漳州累遷戶部侍郎自號薌林居士有酒邊集四卷

胡致堂云薌林居士步趨蘇堂而躋其歲者也

如夢令

午夜涼生翠幔簾外行雲撩亂可恨白蘋風欲雨又還
吹散腸斷腸斷楚夢驚殘一半

生查子

近似月當懷遠似花歲霧好是月明時同醉花深處
看花不自持對月空相顧願學月頻圓莫作花飛去

又

娟娟月入眉整整雲歸髮鏡裏弄妝遲簾外風移影

斜窺秋水長軟語春鶯近無計奈情何只有相思分

鷓鴣天

說著分飛百種猜泥人細數幾時回風流可慣長孤冷
懷抱如何得好開垂玉筍下香堦並肩小語更兜鞵
再三莫遣歸期誤第一頻教入夢來

梅花引

戲代李
師周作

花如頰梅如葉小時笑弄堦前月最盈盈最惺惺閒愁
未識無計說深情一年空省春風面花落花開不相見

要相逢得相逢須信靈犀中自有心通
同杯杓同斟
酌千愁一醉都忘却花陰邊柳陰邊幾回擬待偷憐不
成憐傷春玉瘦慵梳掠拋擲琵琶閒處著莫猜疑莫嫌
遲鴛鴦翡翠終是一雙飛

虞美人

宣和
辛丑

去年雪滿長安樹望斷揚州路今年看雪在揚州人在
蓬萊深處若為愁而今不恨伊相誤自恨來何暮平
山堂下舊嬉游只有舞春楊柳自風流

殢人嬌

席上贈侍人輕輕

白似雪花柔於柳絮蝴蝶兒鎮長一處春風駘蕩驀然
吹去爭得倩游絲半空惹住波上精神掌中態度分
明是彩雲團做當年飛燕從今不數只恐是高唐夢中
神女

南歌子

柳眼風前動梅心雪後寒年華渾似霧中看報答風光
無處可為歡一曲聊收淚三杯強自寬新愁不耐上

眉端怕見長安歸路懶凭欄

又

碧落飛明鏡晴烟冪遠山扁舟夜下廣陵灘照我白蘋
紅蓼一盃殘初望同盟飲如何兩處看遙知香霧濕
雲鬟凭暖瓊樓十二曲闌干

蔡伸

字仲道莆田人襄之孫宣和中官彭城倅歷左中大夫有友古詞一卷

水調歌頭

用盧贊元韻別彭城

醉擊玉壺缺恨寫綠琴哀悠悠往事誰問離思渺難裁

綠野堂前桃李燕子樓中歌吹那忍首重回惟有舊時
月遠遠逐人來 小庭空清夜永獨徘徊伴人幽怨一
枝蕭灑隴頭梅心斷雲帆西去目送烟波東注千里接
長淮為我將雙淚好過楚王臺

滿庭芳

烟鎖長堤雲橫孤嶼斷橋流水溶溶凭欄凝望遠目送
征鴻桃葉蹊邊舊事如春夢回首無踪難忘處薔薇花
下清夜一尊同 城東攜手地尋芳選勝賞偏珍叢念

紫簫聲闌燕子樓空好是盧郎未老佳期在端有相逢
重重恨聊憑紅葉和淚寄西風

蘇武慢

鴈落平沙烟籠寒水古壘鳴笳聲斷青山隱隱敗葉蕭
蕭天際暝鴉零亂樓上黃昏片帆千里歸程年華將晚
望碧雲空暮佳人何處夢魂俱遠憶舊游遼館朱扉
小園香徑尚想桃花人面書盈錦軸恨滿金徽難寫寸
心幽怨兩地離愁一尊芳酒淒涼危欄倚遍儘遲留憑

仗西風吹乾淚眼

飛雪滿羣山

冰結金壺寒生羅幙夜闌霜月侵門翠筠敲竹疎梅弄
影數聲鴈過南雲酒醒歌粲枕愴然猶有殘妝淚痕繡
被孤擁餘香未減猶是那時薰長記得扁舟尋舊約
聽小窻風雨燈火黃昏錦茵纔展瓊籤報曙寶釵又是
輕分黯然携手處倚朱箔愁凝黛顰夢回雲散山遙水
遠空斷魂

虞美人

瑤琴一弄清商怨樓外桐陰轉月華淡淡露華濃寂寞
小池烟水冷芙蓉攀花擷翠當時事綠葉同心字有
情還解憶人無過盡寒沙新鴈甚無書

南鄉子

宣和壬寅予與向伯恭俱為大漕屬
官向有詞云憑書續斷腸因為此詞

木落鴈南翔錦鯉殷勤為渡江淚墨銀鈎相憶字成行
滴損雲箋小鳳凰陳事費思量回首烟波卷夕陽儘
道憑書聊破恨難忘及至書來更斷腸

洞仙歌

鶯鶯燕燕本是于飛伴風月佳時阻幽願但人心堅固
後天也憐人相逢處依舊桃花人面綠窓携手乍簾
幙重重燭影搖紅夜將半對尊前如夢欲語魂驚語未
竟已覺衣襟淚滿我只為相思特特來這度更休推後
回相見

七娘子

天涯觸目傷離緒登臨况值秋光暮手撚黃花憑誰分

付離離鴈落蒹葭浦 凭高目斷桃溪路屏山樓外青
無數綠水紅橋瑣窓朱戶如今總是銷魂處

侍香金童

寶馬行春緩轡隨油壁念一瞬韶光堪重惜還是去年
同醉日客裏情懷倍添淒惻 記南城錦徑名園曾遍
歷更柳下人家似織此際凭欄愁脉脉滿目江山暮雲
空碧

蒼梧謠

天休使圓蟾照客眠人何在桂影自嬋娟

點絳脣

登歷陽
連雲觀

水繞孤城亂山深鎖橫江路帆歸別浦冉冉蘭皋暮
人在天涯鴈背南雲去空凝竚鳳樓何處烟靄迷津渡

又

人面桃花去年今日津亭見瑤琴錦薦一弄清商怨
今日重來不見如花面空腸斷亂紅千片流水天涯遠

王庭珪

字民瞻廬陵人政和八年進士為國子
監主簿晚直敷文閣有廬溪集詞二卷

點絳脣

花外紅樓當時青鬢顏如玉
淡烟殘燭醉入花間宿
白髮相逢猶唱當時曲
當時曲斷絃難續且盡杯中醪

又

上元鼓
子詞

玉漏春遲鐵闌金鎖星橋夜暗塵隨馬
明月應無價
天半朱樓銀漢星光射更深也
翠娥如畫猶在涼蟾下
感皇恩

一葉下西風寒生南浦
椎鼓鳴撓送君去
長亭把酒却

倩阿誰留住尊前人似玉能留否
醉中暫聽離歌幾
許聽不能終淚如雨無情江水斷送扁舟何處歸時烟
浪捲朱簾暮

葉夢得

字少蘊吳縣人紹聖四年進士累遷翰林學士兼侍讀除戶部尚書以崇信軍節度使致

仕贈檢校少保有建

康集石林詞一卷

關子東云葉公妙齡詞甚婉麗晚歲落其華而實之能於簡淡時出雄傑合處不減東坡

賀新郎

睡起啼鶯語掩蒼苔
房櫳向晚亂紅無數
吹盡殘花無

人問惟有垂楊自舞漸暖霽初回輕暑寶扇重尋明月
影暗塵侵上有垂鸞女驚舊恨遽如許江南夢斷橫
江渚浪黏天葡萄漲綠半空烟雨無限樓前滄波意誰
採蘋花寄取但悵望蘭舟容與萬里雲颿何時到送孤
鴻目斷千山阻誰為我唱金縷

菩薩蠻

湖光亭
晚景

平波不盡蘼葭遠清霜半落沙痕淺烟樹晚微茫孤鴻
下夕陽梅花消息近試向南枝問記得水邊春江南

別後人

水調歌頭

九月望日與客習射
西園予病不能射

霜降碧天靜秋事促西風寒聲隱地初聽中夜入梧桐
起瞰高城四顧寥落關河千里一醉與君同疊鼓闌清
曉飛騎引雕弓歲將晚客爭笑問哀翁平生豪氣安
在走馬為誰雄何似當筵虎士揮手弦聲響處雙鴈落
遙空老矣真堪惜回首望雲中

王之道

字彥猷濡須人宣和六年進士歷
朝奉大夫有相山居士詞二卷

如夢令

江上對雨

一晌凝情無語手撚梅花何處倚竹不勝愁暗想江頭
歸路東去東去短艇淡烟疎雨

向

鎬

字豐之河內人
有樂齋詞二卷

南歌子

路盡湘江水人行瘴霧間昏昏西日度巖關天外一簪
初見嶺南山北鴈連書斷新霜點鬢斑此行休問幾
時還準擬桂林佳處過春殘

如夢令

次韻邢子文

夢斷綠窓鶯語消遣客愁無處小檻俯青郊恨滿楚江南路歸去歸去花落一川烟雨

又

書弋陽樓

樓上千峯翠巘樓下一灣清淺寶簾酒醒時枕上月華如練留戀留戀明日水村烟岸

沈瀛

字子壽吳興人有竹齋詞一卷

葉水心云子壽少入太學仕四十餘年絀于王官再入郡三佐帥幕其平生業嗜文字若

性命在身
非外物也

念奴嬌

郊原浩蕩正奪目花光動人春色白下長干佳麗最寒
食嬉游人物露卷香輪風嘶寶騎雲表歌聲迴歸來燈
火不知斗柄西揭 六代當日繁華幕天席地醉拍江
流窄游女人人爭唱道緩緩踏青阡陌樂事何窮賞心
無限可惜年光迫須臾聚散人生真信如客

李邕

字漢老任城人崇寧五年進士第紹興初參
知政事授資政殿學士卒謚文敏有雲龕草

堂集

洞仙歌

柳花

一團蟻軟是將春揉做撩亂隨風到何處自長亭人去
後烟草萋迷歸未定裝點離愁無數飄揚無箇事剛
被縈牽長是黃昏怕微雨記那回深院靜簾幕低垂花
陰下霎時留住又只恐伊家忒疎狂更薦地和春帶將
歸去

漢宮春

瀟灑江梅向竹梢疎處橫兩三枝東風也不愛惜雪壓
霜欺無情燕子怕春寒輕失花期惟是有南來塞鴈年
年長見開時清淺小溪如練問玉堂何似茅舍疎籬
傷心故人去後冷落新詩微雲淡月對孤芳分付他誰
空自倚清香未減風流不在人知

王仲言云漢老少日
作漢宮春詞贈友人

口所謂問玉堂何似茅舍疎籬是也政和間自王省丁
憂歸山東服終造朝舉國無與議者方依假無計時王
黼為首相忽遣人招至東閣開宴出其家姬十數人
酒半唱是詞侑觴大醉而歸數日遂有館閣之命

玉樓春

美人
書字

沉吟不語晴窓畔小字銀鈎題欲遍雲情散亂未成篇
花骨軟斜終帶軟重重說盡情和怨珍重提携常在
眼暫時得近玉纖纖翻羨鏤金紅象管

劉 弁

字偉明廬陵人登元豐進士第
繼中博學宏詞科有龍雲集

惜雙雙令

風外橘花香暗度飛絮綰殘春歸去醞造黃梅雨冷烟
曉占橫塘路翠屏人在天低處驚夢斷行雲無據此
恨憑誰訴恁時却倩危絃語

清平樂

東風依舊著意隋堤柳
搓得鶯兒黃欲就天氣清明時

候

一作
所勾

去年紫陌青門今朝雨
魄雲魂斷送一生憔悴

能消

一作
知他

幾箇黃昏

汪藻

字彥章婺源人進士第歷官中書舍人兼直
學士院擢給事中遷兵部侍郎兼侍講拜翰林

學士有

浮溪集

小重山

月下潮生紅蓼汀殘霞都斂盡
四山青柳梢風急墮流

螢隨波去點點亂寒星 別語寄丁寧如今能間隔幾
長亭夜來秋氣入銀屏梧桐雨還恨不同聽

點絳脣

永夜厭厭畫檐低月山銜斗起來搔首梅影橫窓瘦

好箇霜天閒却傳杯手君知否曉鴉啼後歸夢濃於酒

能改齋漫錄云彥章在翰苑屢致言者作此詞或問曰
歸夢濃於酒何以在曉鴉啼後公曰無奈這一隊畜生
何按曉鴉草堂改作亂鴉歸夢改作歸興
便少意味今從吳虎臣能改齋漫錄正之

曾紆

字公卷南豐人布之子為司農少
卿直寶文閣知衢州有空青集

菩薩蠻

月夜

山光冷浸清溪底
溪光直到柴門裏
卧對白蘋洲
敲眠數釣舟
溪山無限好
恨不相逢早
老病獨醒多
如斯良夜何

徐俯

字師川分寧人由通直郎歷進右諫議大夫
紹興初賜進士出身累擢端明殿學士簽書
樞密院事權參知
政事有東湖集

卜算子

天生一作胸中百種愁
挂在斜陽樹
綠葉陰陰占得春
草滿

驚啼處不見淩波步空憶如簧語柳外重重疊疊山
遮不斷愁來路

趙師俠

一作使字介之汴人然王德昭七世孫舉進士有坦菴長短句一卷

尹先之云坦菴先生詞章摹寫風景體狀物態俱極精巧初不知其得之之易又云先生為文如泉出不擇地

謁金門

耿崗過陸尉

沙畔路記得舊時行處鵲鵲疎烟迷遠樹野航橫不渡
竹裏疎花梅吐照眼一川鷗鷺家在清江江上住水

流愁不去

陳與義

字去非，季常，孫本蜀人。後徙居河南葉縣，政和中登上舍甲科，紹興中拜翰林學士知制誥。參知政事有簡齋集，無佳詞一卷。

黃叔暘云：去非詞雖不多，語意起絕識者，謂可摩坡仙之壘。

虞美人

祖席醉中

張帆欲去仍搔首，更醉君家酒。
吟詩日日待春風，及至桃花開後却匆匆。
歌聲頻為行人咽，記著尊前雪
朝酒醒大江流。滿載一船離恨向衡州。

臨江仙

憶昔午橋橋上飲坐中都是豪英長溝流月去無聲杏
花疎影裏吹笛到天明二十餘年成一夢此身雖在
堪驚閒登小閣眺新晴古今多少事漁唱起三更

張叔夏云

真是自然而然胡仔云清婉奇麗簡齋詞惟此最優

劉一止

字行簡歸安人宣和三年進士紹興中官監察御史累遷給事中以直學士致仕有苕溪

詞一卷

洞仙歌

梅

細風輕霧鎖山城清曉冷藥疎枝為誰好對斜橋孤驛
流水濺濺無限意清影徘徊自照何郎空立馬惱亂
餘香綺思憑花更娟妙腸斷處天涯路遠音稀行人怨
角聲吹老歎客裏經春又三年向月地雲堦負伊多少

夜行船

十頃疎梅開半就折芳條嫩香滿袖今度何郎尊前疑
怪花共人俱瘦測測輕寒吹散酒高城近怕聽更漏
可惜溪橋月明風露長是人歸後

清平樂

相望吳楚遠信無憑據欲倩春風吹淚去化作愁雲恨
雨春應已到三吳楚江日夜東徂惟有汧流魚上不
知尺素來無

青玉案

小山遮斷藍橋路恨短夢難飛去長記脩眉縈曲度約
花開檻映風招袖總是憐渠處追歡我已傷遲暮猶
有多情舊時句極目高樓千尺許竹枝三唱為君淒斷

東日西邊雨

夢橫塘

浪痕經雨鬢影吹寒晚來無限蕭瑟野色分橋剪不斷前
溪風物船繫朱藤路迷烟寺遠鷗浮沒聽疎鐘斷鼓似
近還遙驚心事傷羈客新醅旋壓鵝黃攪清愁在眼酒
病縈骨繡閣嬌慵爭解說短封傳憶念誰伴塗妝綰髻
嚼藥吹花弄秋色恨對南雲此時淒斷有何人知得

喜遷鶯

曉光催角聽宿鳥未驚鄰鷄先覺迤邐烟村馬嘶人起
殘月尚穿林薄淚痕帶霜微凝酒力衝寒猶弱歎倦客
悄不禁重染風塵京洛追念人別後心事萬重難覓
孤鴻託翠幌嬌深曲屏香暖爭念歲寒飄泊怨月恨花
須不是不曾經著這情味望一成消減新來還惡

陳質齋云

行簡是詞盛傳京師號劉晚行

趙長卿

自號仙源居士南豐宗室有惜香樂府十卷

臨江仙

春事猶餘十日吳蠶早已三眠多情忍對落花前醺醺
飄暖雪荷葉媚晴天香淡無心浸酒綠浮可意邀船
時光堪恨也堪憐單衣三月暮歌扇一番圓

又

過盡征鴻來盡鴈故園消息茫然一春憔悴有誰憐懷
家寒食夜中酒落花天見說江頭春浪渺殷勤欲送
歸船別來此處最縈牽短篷南浦雨疎柳斷橋烟

更漏子

燭消紅窓送白冷落一衾寒色鴉喚起馬馱行月來衣
上明酒香脣妝印臂憶共箇人春睡魂蝶亂夢鸞孤
知他睡也無

浪淘沙

綠樹嚙鳴禽已是春深楊花庭院日陰陰簾外飛來雙
語燕不寄歸音舊事懶追尋空惹芳心天涯消息遠
沉沉記得年時中酒後直至而今

卜算子

春水滿江南三月多芳草幽鳥銜將遠恨來一一都啼
了不學鴛鴦老回首臨平道人道長眉似遠山山不
似長眉好

虞美人

雨聲破曉催行槳拍拍溪流長綠楊遶岸水痕斜恰似
畫橋西畔那人家人家樓閣臨江渚應是停歌舞珠
簾整日不開鈎目斷征帆猶未識歸舟

畫堂春

長新
亭

小亭烟柳水溶溶
野花白白紅紅惱人池上晚來風吹
損春容 又是清明天氣當年小院相逢
憑欄幽思幾
千重殘杏香中

菩薩蠻

隔江一帶春山好
平林新綠春光老
休去倚闌干
飛紅不忍看
東流何處去
便是歸舟路
芳草外斜陽行人
更斷腸

朝中措

亂山疊疊水泠泠
南北短長亭
客路如天杳杳
歸心特地寧寧
春光在苒花期
冷落酒伴飄零
柳一作影黃
邊漸綠燒痕黑
處重青

王

灼

字晦叔遂寧
人有願堂詞

長相思

來匆匆去匆匆
短夢無憑春又空
難隨郎馬蹤
山重
重水重重飛絮流
雲西復東
音書何處通

清平樂

墜紅飄絮收拾春歸去長恨春歸無覓處心事欲誰分
付盧家小苑回塘子飛多少鴛鴦縱使東牆隔斷莫
愁應念王昌

張

綱

字彥正金壇人政和四年賜上舍及第釋褐授承事郎徽宗以綱三中首選特除太學官

紹興中參知政事

好事近

梅柳

梅柳約東風迎臘暗傳消息粉面翠眉偷笑似欣逢佳
客晚來歌管破餘寒沉烟裊輕碧老去不禁卮酒索

尊前春色

王十朋

字龜齡，樂清人。由太學廷對，擢第一。除著作郎，遷大、宗、正丞，累遷國子司業。陞侍講，歷四郡守，除侍御史，以龍圖閣學士致仕。謚忠文。有《梅溪集》。

點絳脣

酴醾

野態芳姿，枝頭占得春長久。怕鉤衣袖不放，攀花手試問東風，花似當時否。還依舊謫仙去後，風月今誰有。

陳濟翁


驀山溪





去年今日從駕游西苑彩仗壓金坡看水戲魚龍曼衍
寶津南殿宴坐近天顏金杯酒君王勸頭上官花顫
六軍錦繡萬騎穿楊箭日暮翠華歸擁鈞天笙歌一片
關外千里未歸人前山雨西樓晚望斷思君眼

詞綜卷十一



總校官庶吉士臣張能照

校對官中書臣潘庭筠

謄錄監生臣姚元娘

謄錄監生臣馮日琮